

廣陵覽古卷五

江都顧鑾謝隄氏述

漢

應曜

淮南人漢初與四皓同被徵不至時人爲之語曰商山四皓不如淮南一老

嘉靖惟揚志

枚乘

字叔淮陰人爲吳王濞郎中吳王怨望謀爲逆乘奏書諫不納去之梁從梁孝王遊景帝卽位御史大夫鼂錯損削

廣陵覽古卷五

一

諸侯吳王遂與六國謀反舉兵西鄉乘復說吳王王不能用卒見禽滅乘由是知名

前漢書

鑾按乘七發云以八月觀濤于廣陵之曲江蓋謂爲濞郎中時事也則曲江之在廣陵無疑

董仲舒

廣川人孝景時爲博士武帝卽位以賢良對策出爲江都王非相王帝兄素驕好勇仲舒以禮誼匡正王敬重焉久之王問仲舒曰粵王句踐與大夫泄庸種蠡謀伐吳遂滅之孔子稱殷有三仁寡人亦以爲粵有三仁仲舒對曰粵

本無一仁夫仁者正其誼不謀其利明其道不計其功是以仲尼之徒羞稱五霸爲其先詐力而後仁義也王稱善後徙膠西王相去位歸居終不問家產業以修學著書爲事

漢書

廣陵王胥

王有勇力常於別園學格熊後遂能空手搏之莫不絕脰

西京雜記

張綱

字文紀蜀犍爲人漢安元年時廣陵賊張嬰等衆數萬人

廣陵覽古卷五

二

寇亂揚徐間積十餘年梁冀乃諷尚書以綱爲廣陵太守因欲以事中之綱單車之職將吏卒十餘人徑造嬰壘諭以順逆利害嬰深感悟明日率所部與妻子面縛歸降綱散遣部衆任從所之親爲卜居宅相田疇人情悅服綱被疾吏人皆爲禱祀祈福及卒老幼相攜赴哀者不可勝數嬰等五百餘人制服行喪送到犍爲負土成墳詔追褒之官其子續爲郎中賜錢百萬

後漢書

陳登

字元龍建安中爲廣陵太守明審賞罰威信宣布海賊薛

州之羣萬有餘戶東手歸命未及期年功化以就及遷東城太守廣陵吏民佩其恩德其拔郡隨登老弱襁負而追之魏志

鑿按萬歷志云登在郡時以休暇行城之西二十里濬源為塘溉浸田疇用獲豐稔民名其陂曰愛敬陂卽陳公塘

袁綏

廣陵人為漢太傅掾廣陵太守張超討董卓以綏領廣陵事子廸與陳國陳融陳留濮陽逸沛郡蔣纂皆就吳丞相陸遜弟瑁遊處瑁謂其單貧有志割少分甘與同豐約孫

廣陵覽古卷五

三

曄字思光作獻帝春秋魏志

三國魏

陳矯

字季弼廣陵人太守陳登辟為功曹時廣陵為孫權所圍登令矯求救於曹操矯說操曰鄙郡雖小形便之國也若蒙救援使為外藩則吳人剽謀矣操奇矯欲留之矯辭曰本國倒懸奔走告急縱無申包之效敢忘宏演之義乎操乃遣兵赴救吳軍既退操辟矯為司空掾除魏郡西部都尉曲周民父病以牛禱神縣論棄市矯曰此孝子也表赦

之遷魏郡太守時繫囚千數至有歷年矯悉覽罪狀一時
盡決不立封高陵亭侯遷尚書令丕子叡立進爵東鄉侯
一日叡猝至尚書門矯跪問曰陛下欲何之曰欲案行文
書耳矯曰此自臣職非陛下所宜臨若臣不稱其職請就
黜叡慚而反其亮直如此

魏志

徐宣

字實堅廣陵人曹操辟爲司空掾屬會馬超亂操將西征
見官屬曰今當遠征宜得清公大德以鎮統之乃以宣爲
左護軍留統諸軍還爲丞相東曹掾出爲魏郡太守丕立

廣陵覽古卷五

四

爲御史中丞賜爵關內侯轉散騎常侍從至廣陵六軍乘
舟風浪暴起丕船回倒宣方病獨凌波而前丕壯之遷尚
書叡立封津陽亭侯加侍中光祿大夫嘗上疏陳威刑大
過又諫作宮殿窮盡民力皆手詔嘉納及卒遺令布衣疏
巾歛以時服追贈車騎將軍謚貞侯

魏志

吳

皇象

字休明廣陵江都人幼工書時有張子竝陳良甫能書良
甫適而子竝峻象斟酌於間甚得其妙一時善書者不能

及也官至侍中青州刺史人謂象章草入神八分隸入妙篆入能建業有吳時天發讖及吳大帝碑在江寧府皆象書也

吳志

鑿按嚴觀江寧金石記天璽紀功碑在江寧縣學尊經閣下碑毀于晉季石凡三段形如覆日字列三面而虛其一今考証舊搨連接三段實存二百一十六字又不全十一字辭意乃貫通可讀云云

國朝嘉慶乙丑尊經閣災碑燬于火今片石無存矣
衛旌

廣陵覽古卷五

五

字子旗廣陵人避難江東單身窮困淮陰步騭與同年相善俱以種瓜自給盡勤四體夜誦經傳旌後官至尙書

吳志

閔鴻

廣陵人仕爲吳尙書與丹陽薛兼紀瞻吳郡顧榮會稽賀循齊名號爲五俊

吳志

范慎

字孝敬廣陵人爲吳侍中出補武昌左部督治軍整頓孫皓移都甚憚之詔曰慎勳德俱茂朕所敬憑宜登上公以

副衆望以爲太尉慎自恨久爲將遂託老耄軍士戀之舉
營隕涕慎初爲太子登賓客目之曰究學甄微游夏同科
又云竭忠知己之君纏綿三益之友時人榮之著論二十
篇名曰矯非

吳志

晉

劉頌

字子雅廣陵人厲王胥之後也少能辨物理咸寧中除淮
南相嚴整有政績舊修芍陂年用數萬人豪強兼并孤貧
失業頌使大小計功受分百姓歌其平惠在郡上疏言封

廣陵覽古卷五

六

建用人諸政優詔答之元康初從淮南王八朝詔爲三公
尚書又上疏論律令爲時論所美

晉書

華譚

字令思廣陵人祖融父譚皆仕吳譚期歲孤母年十八守
節鞠養及長好學不倦揚州刺史周浚引爲從事浚愛其
才器待以賓友之禮太康中刺史嵇紹舉譚秀才至洛陽
武帝親策之時九州孝秀策無逮譚者同郡劉頌時爲廷
尉見之嘆息曰不悟鄉里乃有此才尋除郎中遷太子舍
人本國中正後爲鄆城令過濮水作莊子贊永寧初爲郟

令於時亂後境內饑饉譚撫卹有政績再遷廬江內史加
綏遠將軍時石冰之黨屯據諸縣譚遣司馬討平之以功
封都亭侯建興初帝命爲鎮東軍諮祭酒譚博學多通著
書三十卷名曰辨道上牋進之帝親覽焉

晉書

戴淵

字若思廣陵人舉孝廉出補豫章太守加振威將軍以討
賊有功賜爵秣陵侯出爲征西將軍都督兗豫幽冀雍并
六州諸軍事假節加散騎常侍鎮壽陽帝親幸其營勞勉
將士臨發祖餞置酒賦詩至合肥而王敦舉兵詔淵還鎮

廣陵覽古卷五

七

京都進驃騎將軍尋石頭失守淵與諸軍攻石頭王師敗
績淵率麾下百餘人赴宮受詔與公卿百官於石頭見敦
敦問淵曰前日之戰有餘力乎淵曰豈敢有餘但力不足
耳又曰吾此舉天下以爲何如淵曰見形者謂之逆體誠
者謂之忠敦笑曰卿可謂能言參軍呂猗深憾淵說敦曰
周顛戴淵有高名足以惑衆近者之言曾無愧色公不除
恐爲將來憂敦以爲然俄收淵害之淵素有重望四海之
士莫不痛惜焉

晉書

謝安

字安石陽夏人太元中累官侍中都督揚豫徐兗青五州
諸軍事秦苻堅率衆號百萬次於淮淝京師震恐安舉從
子元帥師拒之大敗堅於淝水安進拜太保出鎮廣陵築
壘曰新城以壯保障時城北湖水每漲輒沒民田安築平
水埭隨時蓄洩歲用豐稔後人追思之名爲召伯埭云

晉書

曇詵

廣陵人幼從遠公出家勤修淨業註維摩經嘗著窮通論
以明宿修述蓮社錄以記往生又能別識鳥獸毛色俊鈍

廣陵覽古卷五

八

之性洞曉草木枝榦甘苦之味妙盡其理元嘉十七年集
衆謂之曰建寺以來至此五十年吾之西行最在其後卽
跏趺念佛百聲閉息遂絕

蓮社十八高僧傳

蔡濟

輿縣令時大旱濟乃剡臂然香率衆懇禱甘澍隨降一邑

霑足

萬歷江都縣志

鑾

按漢置廣陵江都二縣元封中又析二縣地置輿縣屬
臨淮郡東漢改廣陵國爲廣陵郡江都廣陵輿縣隸之三
國時江都城圯于江縣廢廣陵郡移治淮陰廣陵縣亦廢

歷吳魏皆未立晉太康元年置廣陵郡縣六年復置江都東晉江都省入輿縣宋元嘉十三年省輿縣入江都自是不復稱輿縣矣

劉宋

徐湛之

字孝源東海剡人元嘉二十四年出爲前軍將軍南兖州刺史湛之善於爲政威惠並行廣陵城有_舊有高樓湛之更加修整南望鍾山城北有陂澤水物豐盛湛之更起風亭月觀吹臺琴室果竹繁茂花藥成行招集文士盡游玩之

廣陵覽古卷五

九

適一時之盛也

宋書

鑿按宋元嘉八年以廣陵江都等四縣立南兖州治廣陵郡

沈慶之

字弘先吳興武康人大明三年竟陵王誕據廣陵反帝以慶之爲南兖州刺史加都督率衆討之誕遣客沈道愍齎書說慶之餉以玉環刀慶之遣道愍反數以罪惡慶之至城下誕登樓謂曰沈君白首之年何爲來此慶之曰朝廷以君狂愚不足勞少壯故使僕來耳慶之塞漸造攻道立

行樓土山并諸攻具時夏雨不得攻城誕餉慶之食提挈者百餘人慶之悉焚之誕於城上授函表令慶之爲送慶之曰我奉制討賊不得爲汝送表每攻城輒身先士卒上戒之曰卿爲統任當令處分有方何蒙楯城下身受矢石耶自四月至七月乃克城斬誕進慶之司空卒贈待中太尉諡曰襄

南史

史宗

常着麻衣號麻衣道人喜怒不常日往廣陵白土埭謳歌自適夜不知其宿處江都令檀祗召與語詞多無畔岸索

廣陵覽古卷五

十

紙賦詩曰有欲苦不足無欲卽無憂未若清虛者帶索披麻裘浮游一世間汎若不繫舟要當畢塵累棲息老山邱檀祗異之

高僧傳

南齊

荀伯玉

字弄璋廣陵人建元元年封南豐縣子世祖在東宮專斷用事任左右張景真其伎人皆著御衣乘畫舫坐胡牀觀者咸疑是太子內外祇畏莫敢言伯玉密啟上收景真殺之愈見親信軍國密事多委使之時人爲之語曰十敕

五令不如荀伯玉命

南齊書

裴昭明

河東聞喜人建武初爲廣陵太守明帝以無所啟奏代還責之昭明日臣不欲競執關鍵故耳昭明歷部皆有勲績常謂人曰人生何事須聚畜一身之外亦復何須子孫若不才我聚彼散若能自立則不如一經故終身不治產業

南齊書

陸慧曉

字叔明子真之子建武中爲五兵尙書遷南兖州刺史慧

廣陵覽古卷五

七

曉清介正立不雜交遊張緒稱之曰江東裴樂也

南史

蕭梁

高爽

廣陵人工屬文齊永明中贈衛軍王儉詩爲儉所賞及領丹陽尹舉爽郡孝廉梁天監初歷官中軍臨川王參軍出爲晉陽令坐事繫治作鑊魚賦以自況其文甚工後遇赦

免頃之卒

梁書

呂僧修

字元瑜東平范人世居廣陵天監五年僧珍以去家久表

求拜墓梁祖欲榮之授本州刺史僧珍平心率下兄子宏以販葱爲業僧珍至棄業欲求州官僧珍曰汝等自有常分豈可妄求叨越但當速返葱肆耳僧珍舊宅前有督郵廨鄉人勸徙廨益宅僧珍怒曰督郵官廨也豈可徙之姊適于氏在市西小屋與列肆雜處僧珍常導從鹵簿到其宅不以爲恥在州百日徵爲領軍將軍僧珍有大勲恩遇隆密性恭慎當直禁中盛暑不敢解衣侍御座屏氣鞠躬果食未嘗舉箸嘗因醉後取一柑食之梁祖笑謂曰便是大有所進祿俸外月給錢十萬賜賚不絕卒諡忠敬侯

廣陵覽古卷五

十一

書

吳元嗣

江都白沙村人子孫多壽百歲上下累業同居不分至吳琬惇義尤篤廣陵太守陳正平以事聞賜號義門置義順二臺以旌之

明南畿志

隋

來護兒

字崇善江都人幼好奇節讀詩至擊鼓其鏜踴躍用兵羔裘豹飾孔武有力舍書歎曰大丈夫當如是安能久事隴

畝羣輩壯其志賀若弼之鎮壽州也常令護兒爲間諜授
大都督平陳之役護兒有功焉進位上開府從楊素繫高
智慧於浙江大業六年從駕江都賜物千段令上千人家
宴父老州里榮之江都之難宇文文化及忌而害之子整武
賁郎將右光祿大夫尤驍勇善撫士擊羣盜所向皆捷賊
甚憚之爲作長歌曰長白山頭百戰場十五五把長槍
不畏官軍十萬衆只畏榮公第六郎化及反皆遇害隋書
鑿按護兒本傳於大業七年楊元感作逆勒兵與宇文述
等擊破之封榮國公子整行六故云

廣陵覽古卷五

三

智聰

住揚州安樂寺大業末隱江荻中誦法華經七日不饑有
四虎遶之不食經十日聰曰吾命須臾卿須可食虎曰造
天立地無有此理忽有一公年可八十掖挾下船曰師欲
渡江棲霞住者可卽上船四虎一時目中淚出聰曰救危
拔難正在今日可迎四虎於是利涉往達南岸船及老人
不見聰領虎同住棲霞院中若有事一虎入寺大聲告衆
由此警悟每以爲式續高僧傳

唐

李襲譽

字茂實隴西狄道人通敏有識度高祖初擢揚州大都督府長史揚州江吳大都會俗喜商賈不事農襲譽爲引雷陂水築句城塘溉田八百頃以盡地利民歸本業召爲大府卿罷揚州載書數車嘗謂子孫曰吾性不喜財遂至窶乏然負京有賜田十頃能耕之足以食河內千樹桑事之可以衣江都書力讀可進求宦吾歿後能勤此無資於人矣

唐書

按嘉靖志云襲譽爲人嚴毅所得廩祿盡散之宗戚以

廣陵覽古卷五

十四

餘貲錄書

曹憲

江都人仕隋爲秘書學士教授數百人公卿多從之遊尤邃於小學自漢杜林衛宏以後古文亡絕至憲復興煬帝令與諸儒撰桂苑珠叢規正文字又註廣雅學者推其該博藏於秘書唐貞觀中揚州長史李襲譽薦之以宏文館學士召不至卽家拜朝散大夫當世榮之太宗嘗讀書有奇難字輒遣使者問憲憲具爲音註援驗詳復帝咨賞之卒年百餘歲

唐書

鑿按唐書憲以昭明文選授諸生時江都公孫羅魏模李善相繼傳授其學大行羅有文選註文選音義善博學淹貫人號爲書簾爲文選注六十卷

王紹宗

字承烈江都人少勤學徧覽經史尤工草隸家貧傭寫佛經以自給每月自支錢足卽止雖高價盈倍亦卽拒之徐敬業起兵揚州聞其高行徵之不起舊唐書

杜佑

字君卿京兆萬年人以工部郎中歷官尚書右丞出爲淮

廣陵覽古卷五

五

南節度使佑決雷陂以廣灌溉斥海瀕棄地爲田積米五十萬斛列營三十區士馬整飭四鄰畏之佑精於吏職爲治不皦察數斡計賦相民利病而上下之議者稱佑治行無闕佑廣劉秩政典爲通典二百篇儒者服其書約而詳唐書

鑿按劉賓客嘉話錄大司徒杜公在惟揚嘗召賓幕閑語我致政之後必買一小駟八九千者飽食訖爲跨之着一粗布襪衫入市看盤鈴傀儡足矣司徒深旨不在傀儡蓋居危地欲自污耳後致仕果行前志諫官上疏言大臣不

合入市公曰中吾計矣又萬曆府志佑爲揚州察訪使景雲三年改爲處置使題名八角石柱見存寶城興教寺內蓋先久沒於池水至明成化間大旱池涸復出也

李邕

字太和江都人善子也少謁李嶠願一見秘書嶠曰秘書萬卷豈時日能習耶邕固請乃假直秘書未幾辭去嶠試問奧篇隱帙了辯如響嶠嘆曰子且名家武后朝嶠爲內史薦邕可任諫諍召拜左拾遺御史中丞宋璟劾張昌宗等反狀武后不應邕立階下大言曰璟所陳社稷大計當

廣陵覽古卷五

六

聽后色解可璟奏中宗時召拜右臺殿中侍御史彈劾任職遷戶部員外郎明皇卽位爲御史中丞左遷括州司馬起爲陳州刺史貶遵化尉徙澧州司馬開元中起爲括州刺史復坐誣枉上識其名詔勿劾後歷淄滑二州刺史邕早有名重義愛士久斥外不與士大夫接及入朝人傳其眉目瓌異阡陌聚觀後生望風投謁門巷填溢復以讒媚出爲汲郡北海太守天寶六載宰相李林甫忌邕名盛因傳以罪遣羅希奭就郡杖殺之代宗時贈祕書監邕文長於碑頌官屢黜天下慕其名盧藏用嘗謂邕如干將莫邪

難與爭鋒但虞缺折耳

唐書

姚崇

字元之陝州硤石人以言事貶申州刺史移徐潞二州遷揚州長史政條簡肅人爲紀德於碑崇長吏道處決無淹思三爲宰相封梁公卒謚文獻

唐書

葉天師

唐開元十八年正月望日帝謂葉天師曰今夕何處最麗對曰廣陵帝曰何術以觀之師曰可俄而虹橋起殿前板閣架虛欄楯若畫帝步而上太真高力士及樂官數人從

廣陵覽古卷五

十七

行步步漸高頃到廣陵寺觀陳設之盛燈火之光照灼殿基士女鮮麗皆仰面曰仙人現於五色雲中帝大悅敕伶官奏霓裳羽衣一曲後數日廣陵果奏云

幽怪錄

第五琦

字禹珪京兆長安人至德初謁肅宗於彭原言今之急務在賦賦所出以江淮爲淵若假臣一職請悉東南穀飛餉函洛惟陛下命帝悅拜監察御史勾當江淮租庸使琦隨事趣辦人不益賦而用以饒累封扶風郡公

唐書

劉晏

字士安曹州南華人廣德二年爲江淮轉運租庸常平使
晏始於揚子造轉運船每一船破錢千貫或譏其妄費晏
曰大國不可以小道理凡所創造須謀經久廼於揚子縣
置十船塲差專知官十人不數年間皆致富贍凡五十餘
年船無破敗餽運亦不闕絕晏理鹽鐵惟置官於出鹽之
鄉取鹽戶所煮鹽鬻於商任其所之不出鹽州縣不復置
官曰官多則民擾其始江淮鹽利不過四十萬緡季年六
百餘萬緡末年更逾十倍而人不厭苦古今稱善理財獨
晏云

參唐書嘉靖惟揚志

廣陵覽古卷五

六

竇常

字中行京兆人大歷間及進士第隱居廣陵之柳楊著書
二十年不出後淮南節度使杜佑辟爲參謀元和間自湖
南判官入爲侍御史轉水部員外郎出刺朗州固陵潯陽
臨川四郡入爲國子祭酒致仕卒贈越州都督弟牟羣庠
鞏皆工詞章時號五竇

全唐詩小傳

李珣

字待價其先出趙郡客居淮陰累官至吏部尙書出爲淮
南節度使時江淮旱珣發倉廩賑流民以軍儲羨殺半價

與人及疾亟官屬見卧內惟以州有稅酒直而神策軍爲
豪商占利方論奏未見報爲恨一不及家事珽寡欲門無
餽餉淮南人德之立碑刻其遺愛卒贈司空諡貞穆

唐書

杜牧

字牧之京兆人牛僧孺鎮揚州牧在幕中夜多微服逸遊
公聞之以街子數輩潛隨護之以防不虞後牧之以拾遺
召臨別公以縱逸爲戒牧之始猶諱之公命取一篋皆街
子報杜書記帖乃大感服

芝田錄

李吉甫

廣陵覽古卷五

五

字宏憲贊皇人年少明練典故累官至檢校兵部尚書出
爲淮南節度使帝爲御通化門祖道居三歲奏蠲逋租數
百萬築富人固本二塘溉田且萬頃漕渠庫下不能居水
乃築隄閘以防不足洩有餘名曰平津堰江淮早有司不
爲請吉甫白以時救恤帝馳道使分遣賑貸吉甫雖居外
每朝廷得失輒以聞卒贈司空諡忠懿

唐書

杜悰

佑子爲淮南節度使武宗聞揚州娼女善酒令勅監軍選
十八人以獻監軍請悰同選悰曰監軍自受勅不敢與聞

監軍怒具奏其狀武宗曰杜悰得大臣體朕甚愧之勅勿選

明南畿志

王龜

字大年江都人起之子武宗知其名以左拾遺召不赴崔璵觀察宣歙表爲副龜樂宛陵山水從之咸通中改太常少卿同州刺史牙將白約素暴橫常譁言月廩薄以動士心爲亂龜捕殺之人皆震慄

唐書

變

按起爲王播之弟家江都之瓜洲

辛讜

廣陵覽古卷五

辛

太原尹雲京孫居廣陵性慷慨重然諾專務賑人之急咸通十年龐勛亂徐泗時杜悛守泗州賊極力攻城讜聞往勸悛避去悛不肯讜義之夜以小舟穿賊壘至洪源驛請監軍郭厚本救泗厚本已諾淮南都將王公弁沮之讜拔劔瞋目呼曰泗州陷在旦夕公等奉詔赴援逗遛不進欲何爲卽欲揮刃向公弁厚本持之讜望泗州大哭帳下皆流涕厚本義其心選士卒隨讜入泗夜半斬賊柵大呼由水門入賊軍駭退人心遂固旣而賊益兵攻城以鐵鑊斷淮流梯衝雲合凡周七月晝夜不息賴讜犯難仗義求救

淮北諸軍會馬舉以大軍至賊解圍去卒全一州皆讜力也

舊唐書

劉白雲

江都人家富好濟人遇道士樂子長與兩卷書能役致風雨變化萬物於襄州隔江山上結紫雲幄化兵士數千人待衛連月不散節度使于頔疑其妖使兵馬使攻之弓矢不能及白雲乘馬走漢水蹙波起塵如履平地追之不得辰發靈州午已至湘潭須臾七百里復於江都值樂真人授以金液九丹之經乾符中猶在長安市賣藥尙有識之

廣陵覽古卷五

三

者

康熙府志

李磻

字景雲鄜之孫也黃巢陷洛磻挾尙書八印走河陽時畱守劉允章爲賊脅遣人就磻索印拒不與襄王之亂磻流寓淮南高駉受僞命磻苦諫不納入爲翰林學士辭職歸乾寧元年召進禮部尙書同中書門下平章事後爲王行瑜所殺行瑜誅詔贈司徒諡曰文磻嗜學家有書至萬卷世號李書樓所著文章及注解諸書傳甚多

唐書

五代

嚴可求

同州人隨父遷江都少爲吳幕僚吳王歿張顥欲自立厲聲謂諸將曰軍府誰當主者三問莫應可求前密啟曰方今四境多虞非公主之不可然今日則恐太急顥默然可求急趨出書一紙內袖中麾同列往使宅賀衆莫測旣出教宣之乃吳王母史太夫人教也大畧言隆演當次立諸將宜無負楊氏辭旨激切顥氣色皆沮以其義正不敢奪吳王隆演乃得立顥知爲可求所賣夜遣盜刺之可求度不免爲書辭府主盜執刀臨之可求操筆無懼色盜粗識

廣陵覽古卷五

三

字見其辭氣忠壯曰公長者吾不忍殺遂舍之去南唐時歷遷門下侍郎尙書右僕射同平章事

十國春秋

申漸高

事睿帝爲樂工常吹三孔笛賣藥於廣陵市乾貞時按籍編括而關司歛率尤繁商人苦之會都城亢旱中書令徐知誥謂左右曰近郊頗得雨都城不雨何也得非刑獄有寃乎漸高作諧語進曰雨畏抽稅不敢入城耳知誥大笑明日下教弛額外稅信宿大雨霑洽

十國春秋

毛貞輔

僞吳臣累爲邑宰應選之廣陵夢吞日旣寤腹猶熱以問
侍御史楊廷式曰此夢至大非君所能當若以君而言當
得赤烏場官也果如其言

徐鉉稽神錄

李德誠

廣陵人幼從吳武王征討積功至江南馬步軍使與諸將
圍安仁義於潤州仁義就執德誠拜潤州刺史歷撫虔洪
三鎮節度使平南將軍中書令李主受吳禪以佐命拜太
師封趙王自洪州入覲命宮人迎勞於路百官班謁於門
朝堂設幄爲具每有大議遣執政就第諮問然爲人謙恭

廣陵覽古卷五

三

書
深厚終始如一卒諡忠懿子二十八人皆右職

陸游南唐

李建勳

字致堯德誠第四子少好學能屬文尤工詩家世將相然
杜門不預世事所交皆寒峻裘馬取具而已李主昇鎮金
陵預禪代之策拜中書侍郎同平章事璟嗣立以開國元
勳又聯姻戚尊遇之與宋齊邱埒出爲撫州節度使建州
之役諸將無復紀律建勳請官出金帛贖俘掠還其家召
拜司徒致仕賜號鍾山公營別墅於山中放意泉石曰吾

自知不壽求數年間適耳疾革遺令勿封樹立碑遺他日
毀斲之禍贈太保諡曰靖

陸游南唐書

李貽業

廣陵人事南唐爲翰林學士李主昇殂大臣欲奉宋后臨
朝命中書侍郎孫昇草遺詔貽業曰此奸人所爲大行嘗
謂婦人預政亂之本也安肯自爲此若果宣行貽業當對
百官裂之議遂寢李主璟語貽業曰疾風勁草於卿見之
保大中以兵部侍郎卒諡曰簡

陸游南唐書

馮延巳

廣陵覽古卷五

五

字正中廣陵人以文雅博瞻稱南唐時授祕書郎歷官至
左僕射同平章事延巳工詩雖貴且老不廢識者謂有元
和人氣格元宗樂府詞有句云小樓吹徹玉笙寒延巳有
風乍起吹皺一池春水之句皆爲警策元宗嘗戲延巳曰
吹皺一池春水干卿何事延巳曰未如陛下小樓吹徹玉
笙寒元宗悅

叅馬令南唐書萬歷府志

潘祐

廣陵人文章贍逸敏於議論南唐後主時爲史館修撰知
制誥自言其母方娠夢古衣冠人告曰我顏延之也與夫

人爲子及生七歲始能語曰兒悞傷白龍爲上帝所罰也
因吟詩曰只因騎折玉龍腰謫在人間三十六後果以三
十六歲卒

馬令南唐書

徐錯

字楚金廣陵人與兄鉉相友睦常共用墨一圭弟馬未歸
兄馬不肯茹草兄出亦如之鉉以直諫被逐錯思念涕泣
至失心其母請於李主曰法有兄弟相罪及今願錯與鉉
俱貶以緩其疾李主哀之爲召鉉鉉還而錯病已昏瞶不
識人家人反覆告之猶自記兄背有黑痣子發衣驗之遂

廣陵覽古卷五

五

抱持噬其痣號哭幾至氣絕錯嘗著說文解字韻譜十卷
說文解字繫傳四十卷

嘉靖惟揚志

韓令坤

磁州武安人少隸周祖帳下以功爲馬軍都指揮定武軍
節度世宗親征淮南聞揚州無備遣令坤等襲之令坤先
以精騎數百遲明馳入城中不之覺令坤繼至撫之民皆
安堵遂以令坤知州事顯德五年世宗復幸淮右揚州城
爲吳人所毀詔發丁壯別築新城命令坤爲修城都部署
宋初同平章事加侍中

宋史

劉元英

號海蟾子廣陵人仕燕主劉守光爲相一旦有道人來謁
索雞卵十枚金錢十枚置几上累卵于錢若浮圖狀海蟾
驚嘆曰危哉道人曰人居榮樂之場其危有甚於此者復
盡以錢擘爲二擲之而去海蟾由是大悟易服從道歷游
名山所至多有遺跡宋初于潭州壽寧觀題詩仍自寫真
其旁

湖廣總志

鑿按海蟾二字其號也俗呼劉海更言劉海戲蟾舛謬之
甚

廣陵覽古卷五

三

廣陵覽古卷五終

男朝生校字

